

# Il feu sin ils culms, da valita u betg?

DAD AUGUSTIN BEELI/FMR

■ **Quest onn, l'extraordinari da la pandemia, hajan ins vendì per la festa dal prim d'avust uschè bler material per fieus artificialis sco anc mai. Quai han ins udi e legì ils davos dis. Arder in bel e grond feu «nateral» è pli stentus. Igl è in simbol che sa sperda.**

La Festa naziunala 2020 para d'esser ambivalenta: D'ina vart na datti absolutamain naginas scuntradadas publicas ed acts uffizials. Da tschella han ils negozis vendì uschè bler material per l'emprim d'avust sco anc mai. I sto esser che la glieud vul tuttina s'inscuntrar. Restar solitaris ed arder tant bler è strusch pussaivel. Ins po esser plain mirveglias per damaun, l'emprim d'avust 2020. En scadin cas pudess la polizia avoir grev da tegnair la survista e controlar sche la populaziun sa tegn vi da la distanza minimala dad 1,50 meters e vi da la recumandaziun da metter si mascrina.

I dat blers che commemoreschan la Festa naziunala en in'otra furma. Uschia s'envidan mintg'onn, cura ch'i vegn stgir, ils fieus sin ils auts. I tutga tar la regurdientscha d'uffant ch'ins gieva sin la plazza da scola per la festa. Il lampiun cotschen cun la cruscha alva tutgava tar il ritual. Mintg'onn gieva mintgin cun grond plaschair sin il surcombras per quest utensil custaivel. Sin la piazza s'inscuntravan ins ed in oratur fascheva in pled lungurus. Ins na pudeva betg spetgar cun arder in zulprin bengal. La societad da musica intunava l'imni, alura chantavan

tuts plain ardur «Cu la pezza beinmarvegl, splendurescha el sulegl». Ils uffants spetgavan che lur babs laschian ir vulcans e rachetas. Tgi ch'aveva in «sulegl» era in erox.

Alura n'era la festa da l'emprim d'avust dentant anc betg finida. Insatge era essenzial: Suentar cumenzavan ils fieus ad arder giu dals auts. In suenter l'auter, dad ost vers vest, s'envidavan quels, sco ch'i pareva, tut da sasez. Si Brün vesevan ins in feu, giu dal Mund-aun cumparevan divers, sin ils culms da Sevgein, a Ladir. Quels da Castrisch faschevan in grond sur il vitg. Lezs, vi là da tschella vart dal Rain, pudevan era vesair il feu sin il Tumpiv e blers en direziun dal Crap da Flem. Quels na pudevan nus da Sagogn betg vesair. Noss feu, sco salid als auters vitgs, ardeva davent da Plaun Pigniel.

La tradiziun dal feu sin ils culms è fitg veglia. I dat diversas teorias da la derivanza e funcziun. In fatg practic or da l'istorgia è dentant cler: In feu era med da comunicaziun. Mintga feu era in signal. I pudeva esser in nausch. In alarm, per exempel d'in inimi. U in mortori. Il signal d'in grond feu gieva d'ina collina a l'otra, d'in punct exponì, d'in sumfil, a l'auter. In «bun» feu ardeva per parter la solidaritad. Vitgs ed aclaus n'eran betg populads spess, ins sa conuscheva, sa gidava e parteva. Quels fieus en ils culms èn anc oz ferm simbols. Deplorablain sa perdan els, or da spira admiraziun per ils fieus artificialis bombastic-

fulminants. A nus uffants n'han ins mai declerà la teoria dal ferm simbol. Nus n'avessan er betg chapì quella. Gia alura, avant pli che 50 onns, avevan tuts mo pli

egls per ils fieus artificialis. Tut il nov, tut il modern, era en urden. Tut il vegl (ils buns fieus sin ils auts) era antiquà e senza valita.

